

摘藻堂四庫全書薈要

集部

欽定四庫全書薈要

集部

丹淵集卷一  
四至



詳校官助教臣常循

欽定四庫全書薈要

丹淵集目錄

卷一

詞賦

卷二

樂府雜詠

卷三

詩



卷四

詩

卷五

詩

卷六

詩

卷七

詩

卷八

詩

卷九

詩

卷十

詩

卷十一

詩

卷十二

詩

卷十三

詩

卷十四

詩

卷十五

詩

卷十六

詩

卷十七

詩

卷十八

詩

卷十九

畫廚雜詠

卷二十

挽詩

卷二十一

雜著

卷二十二

記

卷二十三

記



卷二十四

記

卷二十五

序

卷二十六

序

卷二十七

表

卷二十八

表

卷二十九

啟

卷三十

啟

卷三十一

啟

卷三十二

啟

卷三十三

先狀

卷三十四

奏狀

卷三十五

文

卷三十六

墓誌

卷三十七

墓誌

卷三十八

墓誌

卷三十九

墓誌

卷四十

墓誌

拾遺上

詩

拾遺下

雜著

臣等謹按丹淵集四十卷宋文同撰同字與

可梓潼人漢文翁之後故人以石室先生稱

之皇祐元年進士解褐為邛州軍事判官後

歷知陵州洋州改湖州未至而卒至今畫家

稱文湖州從其終而言之也遺文五十卷其

曾孫驚編為四十卷慶元中曲沃家誠之守

邛州以同嘗三仕於邛多遺蹟因取其集重

加釐正而卷帙則仍其舊所增拾遺二卷及

卷首年譜卷末附錄司馬光蘇軾等往來詩

文一卷則誠之所輯也同未第時即以文章

受知文彥博其詩如美人却扇坐羞落庭下  
花諸篇亦盛為蘇軾所推特以墨竹流傳遂  
為畫掩故世人不甚稱之然馳驟於黃陳晁  
張之間未嘗不足頡頏上下也集中稱蘇軾  
為胡侯或曰蘇子平見誠之跋中蓋其家避  
忌蜀黨而改之今亦姑仍其舊云乾隆四十  
二年十月恭校上

總纂官臣紀昀臣陸錫熊臣孫士毅

總校官 臣 陸費墀



欽定四庫全書蒼要卷一萬四千七百八十九

集部

丹淵集卷一

宋 文同 撰

詞賦

超然臺賦

方仲春之盎盎兮覽草木之菲菲胡怫鬱於余懷兮悵  
獨處而無依陟危譙以騁望兮丘阜摧姜而參差窮莽  
蒼以極視兮但浮陽之輝輝忽揚颺以晦昧兮灑氛霾

於四垂躋余心之所行兮欲溷溷其安之蛻余神以遐  
驚兮控沆寥而上馳闢晻曖以涉瀕洞兮揮霓旌而掉  
雲旗導長彗以天矯兮從宛虹之委蛇曳采旒以役朱  
鳳兮駕瓊輶而驅翠螭涉橫潢以出沒兮歷大曜而蔽  
虧壯萬里以一息兮俯九州而下窺有美一人兮在東  
方去日久兮不能忘凜而潔兮岌而長服忠信兮被文  
章中皦皦兮外琅琅蘭為襟兮桂為裳儼若植兮奉珪  
璋戢光耀兮秘芬芳賈世用兮斯卷藏遊物外兮肆猖

狂余將從之兮遙相望回羊角兮指龍肱轉岵夷兮蹴  
扶桑倚泰山兮聊徜徉下超然兮拜其旁願有問兮遇  
非常勿掉頭兮告以詳使余脫彌天之網兮解逆物之  
韁已而釋然兮出有累之場余復僂僂兮來歸故鄉

石姥賦

上簷崙之飛泉兮披薈蔚之榛莽  
胥倦執而膺喘兮窮其巔於絕岵  
爰有石而跂跂兮旁無他而相伍  
色黝黝而骨勁劣兮具支節而帶文  
縷其遠睨之若人兮迫猶

疑其蹲虎里俗神而甚恭兮號相尊其曰姥謂遽亟而  
丐貺兮緣其求而下予忽旱陽赫而上藝兮飛光流而  
燎土燁多稼以巨飢兮烹羣命于碩黼走羣靈而莫答  
兮後率歸而此愬役稚耄而竭蹶兮來號呶而詔諄會  
諸力以掀揭兮使轉移其常處靈歛然而見景怪兮衆  
外愕而中怖愉堀堞而下發兮鬱黯爟而上布憺砰磕  
而中作兮漭滂沱而四注回極熾而施大潤兮曾不暇  
乎旋步已復還其故立兮各再拜而引去問其端而何

從今年皆失其幾許吾聞懷澤之與符陽兮亦有石為  
牛鼓彼民釁而擊之兮常以旱而取雨宛其於爾為類  
兮彼又載于國譜噫惟皇之大職兮繫陰陽之煦嫗奚  
磊砢之頑質兮輒矯權而自主事豈無於適然兮而惑  
者槩從而為語皇忽寤而震恚兮列罪目而爾數訶星  
士以施棜兮勅雷將而揮斧赫電火而仄爾兮鼓箕風  
而蕩汝閭大空而泮散兮一摩剋其處所俾愚黎之偪  
正兮識惟皇之覆露皇未寤而民尚惑兮徒吾髀之長

拊

蓮賦

彼芳蓮之紛敷兮乃橫湖之繡繪挺濁淤以自潔兮澡  
清漪而逾麗纖空其上下兮細理周其向背甘液凝而  
露浥兮清香馥而風遞內冰筋與玉骨兮外吐心而露  
肺承寶座之千趺兮蔭琬與之萬蓋張翠帷於月下兮  
列綵仗於煙際容鷗鷺之徙倚兮取龜魚之芘賴既帖  
水以不競兮復汭涯而自退實華蘢之上品兮豈草木

之一槩

松賦

度衆木而特起兮有高松之可覲擢雙幹以旁達兮聳  
千尋而上擊怪難入於圖畫兮老莫知其歲厯含古意  
以茫昧兮負天材而岑寂柯磅礴而如抱兮葉獬獫而  
若竄停餘雪而暖溜兮棲宿雨而晴滴險穴聚乎魑魅  
兮陰拊藏乎霹靂蒙煙霧之灑潤兮傲冰霜之慘戚榮  
枯繫乎所托兮用捨由乎見覩敢並名於杞梓兮甘取

誚於樗櫟

問神詞

并序

丙申歲夏五月南幽大旱土人走寧之要  
厔池取神水者如市既得各就其社祀以  
禱雨然踰旬不應民甚恐懼禾稼焦槁不  
得食以死且疑神何不若嚮時之速驗也  
羣口咨嗟余聞之為作問神詞使歌之凡  
三篇如左



惟歲之旱兮叩羣靈而寂然  
蠶踵汗額以歷它疆兮俾  
趨神之所淵飾盎缶以借餘潤兮輦護以歸期監乃衷  
之虔兮少悼民之凶饑巫歌覲舞兮舌橋而腕垂原呼  
野召兮翁走而嫗馳奉新絜以羅庭戶兮日屢薦而益  
祇吾將問神兮不閔此而曷為

二

寧山之環兮寧水之灣吾神宅茲兮幾千百年土民所  
仰兮重如一天凡旱取雨兮易若手然潤逐灌洒兮陰

隨病煙盡秦之境兮歲無赭田茲夏隴之搞涸兮風燥  
而日煎吾將問神兮豈或不職而累前

三

神嘗以功兮荷天之福袞畫藻火兮晁垂螭玉樓殿軫  
輶兮楹廡聯屬炫煇煜兮盤山結谷幄帟之下兮雲藏  
雨蓄宜以其潤兮惠吾百穀胡為自嗇兮肆魃之酷吾  
將問神兮寵其為辱

去陵

度龍嵒兮外岑峯宛詰竭兮辭高而謁深望巉巖之危  
堞兮隱重闔于幽林石塗齟齬而直注兮盤苔磴乎千  
尋問守居之何所兮凌絕壑而繚層巒廡鬱其紆紉  
兮觀閣緣乎孱顏嗟余胡為棲此兮日儔伍乎羣山歲  
月淹其兩周兮悵何時而當還煬兮懾懾兮慄若寐之  
覺兮疾而復承詔易守漢上兮幸旋轉于夷陸側身東  
望兮掣余思而太息山中不可以久留兮無四時而蕭  
瑟

秋望

愴嶷立兮臨層巔極延迤兮睇遙川杳營營兮其何之  
馳滉漭兮浮寥然彼美人兮在一方望泊鬱兮蔽雲煙  
期將邁兮殫所思念莫致兮勞且惓零露濛濛兮促其  
歸灑涕淚兮紛如泉

送李道士

雲離離兮風漭漭羣山空兮萬木凋水滉漾兮大野平  
天沈寥兮新霜晴送先生兮歸鵝池晨霞鮮兮明羽衣

乘青驪兮度南岡荷瓊笈兮秘雲章先生去兮來何時  
上三嵎兮余之思閑居靈巖兮摘錦詞有鶴可使兮其  
致之

哭仲蒙二章

惜憐栗兮臨清秋懷坐憤兮紛予憂拂其弭兮久復留  
念將焉適兮升高丘問胡然兮予之思絙予心兮不解  
以繆謂遐闊兮願如其宮悵西南兮川塗緬脩已忽寤  
兮往嘗此以計蓋子之生于世兮期為已休萬感芸然

兮盡予之中魄幹漂潰兮索其若抽念子一去兮不可  
以復見顧予之於道兮尚胡為而此謀欲子似兮取友  
但寥寥兮安求孰識子兮予深當何人兮與侔彼徒以  
文行兮為子之高其不為賤正體而貴余肱如刻畫兮  
妄以累子類神珠兮豐天球知子之末兮尚可以表世  
其不能究者兮彼又何尤已矣乎子之存兮在予憶子  
之疾兮將何時而可瘳歛予恨兮暮來歸煙雲飄蕭兮  
奉予以愁

右臨高

念子將歸兮于嵩之陽彼山之中宅羣僊兮欣得子而  
翱翔冠之英兮佩蘭芳躡暉暉兮服熒煌執瓊笈兮披  
錦囊遡天風兮誦霞章神君揖兮登寶牀玉女進兮奉  
瑜觴予浩歌兮頌靈休瑤瑟差薦兮相與子之獻酬客  
下緱嶺兮飄霞旒人來潁陽兮駕琳輶蟠桃春兮白榆  
秋雲開月皎兮桂巖之幽子之樂兮千萬億年下視此  
世兮不肯還猿嗥鶴哀兮恍惘乎空山相望何所兮杳

莫可攀

右懷嵩

仲蒙為人無所不脩采摘一二以為其美行  
累之多矣劉元平嘗論人之賢者曰無長仲  
蒙似之故同之二章為此熙寧辛亥仲秋癸  
酉仁壽郡東齋題

哭任遵聖

覽顥宇之渺漭兮悲萬彙之漂搖  
林薄颺以殞瘁兮帶



原隰之蕭條，離魂之怫鬱。兮紛渙散而孰招，悵節物之變易兮。付餘懷以無聊，念先生之生此兮。皇曷為而有之，既誕畀以才德兮。又復艱其所施，使輾轉於偏側兮。躓其行而莫馳，哀抱憤以遽去兮。問誰賢而爾師，飽道義兮。富文章，轟大聲兮。發洪光，潔如玉兮。凝如霜，堅不可撓兮。凜不可當，嗟爾世俗兮。曾莫測其所高，但輒詆以絕衆兮。實自疵于爾曹，且勿辨其薌臭兮。混蘭藏於蓬蒿，不善擇其至行兮。務族譟而叢嗥，今已矣兮。想

子立而孤居游瀕洞而入齋淪兮乘威鳳而跨鯨魚出  
入乎無極兮旁羊乎太虛下視夫塵寰兮諒將厭其如  
智惟不肖兮有性自天蹈大道以直騫兮繇中軌而掉  
長鞭寧剛折而方毀兮恥從柔而逐圓獲稠人之笑詈  
兮獨先生之見憐負先生之所與兮羌莫恤乎其它今  
既失先生之為徒兮顧泯泯而奈何茲忽計以大事兮  
還英氣于岷峨恨不能撫柩以一訣兮橫涕淚而滂沱  
亂曰先生之美兮豈衆人之足云兮先生之慶兮有弟

賢而子文兮先生之安兮地既吉而可墳兮先生之壽  
兮期萬祀而有聞兮夫何憾耶

哭許駕部

羣余登大嶠以回軫兮過君公之故里涉郊垌而歷閭  
閔兮聆絃歌之盈耳稔德義於洋洋兮時屬君之令此  
因執名以願見兮遂日親於燕几挹佳論之端潔兮識  
所存之可喜議為邑之良術兮欲儷君而無幾後余出  
守於陵陽兮君亦擁麾于通義封壤相切行不越宿兮

朝暮之間愈美彼邦之政素艱其施兮前罕稱乎善治  
惟君之才力强敏兮條若紛絲之就理余改符於漢中  
分君復駕題輿於錦水閱月未久而君以疾聞兮忽遽  
傳乎君之不起哀哉淑人之云亡兮無由撫棺而問天  
以死徒臨風以永歎兮何壽夭禍福之反是獲河內之  
來計兮蒙不鄙於君之子云將歸君于幽宮兮撰吉日  
而且邇湯湯乎大河之濬兮戕戕乎大行之趾岸磅礴  
而岡隱嶺兮茲有利乎君之所止限川塗之脩緬兮阻

陪葬乘之末軌悼余懷以遐薦兮曾莫殫於累紙酌芳  
椒以盈樽兮寘生芻而在篚遠不能修此以奠君兮悵  
音容之已矣

送人

風寥寥兮黃茱飛黯栗冽兮寒滿衣歷歌嶽兮山逕微  
背晨霞兮送子歸子之居兮錦水湄樂莫樂兮奉庭闈  
凝流塵兮掩瑤徽知此音兮天下希

玉女

艷明霞兮體霏煙秀婉嫵兮靜嬋娟如龍之矯兮鳳之  
翩脩見光景兮忽自還乎杳然宅幽宮兮閔靈困領羣  
娣兮司寶泉福斯民兮千萬億年享豐祀兮期終山

登山

余將往兮南山路翫靡兮何高昧其適兮茫茫歷崎嶇  
兮嵯峨枳棘紛兮鈎衣解難進兮前阿指屢血兮險艱  
翳冒拂兮叢蘿地虺結兮伺人復虎兕兮羣嗥念失足  
兮安逝其悵恨兮奈何



丹淵集卷一



欽定四庫全書薈要卷一萬四千七百九十

集部

丹淵集卷二

宋 文同 撰

樂府雜詠

秦王卷衣

咸陽秦王家宮闕明曉霞丹文映碧鏤光采相鈎加銅  
螭逐銀猊壓屋矜蟠拏洞戶鎖日月其中光景賒春風  
動珠箔鸞額金窠斜美人却扇坐羞落庭下花閒弄玉

指環輕冰扼紅牙君王顧之笑為駐七寶車自卷金縷  
衣龍鸞蔚紛葩持以贈所愛結歡期無涯

殿前生桂樹

童童彼芳桂藹藹生廣內靈根浹和液柯葉冬不改日  
月最臨照雨露偏汪濊願保剛勁質與君同萬歲

臨高臺

臨高臺望故鄉地千里天一方極目外空茫茫孤雲飛  
不我將安得羽翼西南翔

自君之出矣

自君之出矣，弔影度晨夕。中門一步地，未省有行迹。閨闈足儀檢，常恐犯繩尺。欲寄錦字書，知誰者云的。

東門行

士有失所偶，難甘蓬蓽微。拔劍出東門，感憤不顧歸。賢哉彼嘉匹，逐逐牽其衣。願同此饘粥，節義安得違。況今謂清世，不可復為非。

西門行

盛年可愛重芳辰宜嬉遊金甌釀醇酒玉盤炙肥牛青  
春九十日不可一日休勿自汨浩氣滿胃藏百憂君莫  
惜黃金黃金身後讐自古貪與吝常為賢者羞

塘上行

寒塘漲新雨灩灩翠波滿沙晴步聲澁風引羅帶緩蒲  
牙妬舌利荷葉歡心卷生平玉衣夢至此神亦誕徒誦  
小星篇無人覺腸斷

釣竿

霜刀裁綠筠，桂餌掛輕緡。歛迹天地間，側身江海濱。悠  
悠寶帳夜，寂寂烟波春。何時投竿歸，再與君子親。

烏生八九子

南山有烏，烏生子。層崖巔戢戢，新羽成相將。弄晴烟朝  
饑，集壠上暮渴。來巖前，託居深林中。自足終爾年，胡為  
去所依。無乃甘棄捐，却愛庭樹好。羣飛投碧圓，高枝踏  
未穩。身已隨潛弦，因知萬物理。主者持默權，凡云愛此  
命，生死期已然。出入既有定，何歎於後先。

野田黃雀行

鵲鵲鏗鯨宴瑤臺紅鷗弄翼春徘徊和風入坐賓主樂  
金觥玉豆天中來勸君劇飲莫自訴暗中光景能相催  
試看庭前好花謝枝下落多枝上開人生不厭苦行樂  
勿用感促相驚猜賢愚貴賤各有命此理悟者真賢哉  
苦寒行

上太行兮高盤盤日將暮兮歲已闌入谷口兮出林端  
風慘慘兮吹骨寒冰霜結兮玉嶺圠光上照兮天色乾

紛橫委兮草樹殘黯慄烈兮烟雲靄僕足輓兮馬蹄抗  
望所舍兮摧心肝囊立空兮衣且單嗟道途兮胡艱難  
苦熱行

黃人頓駕留天中金鷄吐火燒碧空炎光染雲聳岌岌  
旱氣爍土飛蓬蓬龍搖乾胡不作雨虎裂渴吻無生風  
安得有術擘海水入底一扣鮫人宮

俠客行

紫髯圍碧瞳勇氣炙坐熱生平脫羈勒少小服義烈堂

堂吐高論牙齒若嚼鐵寶劍壓脰橫誰恥我可雪酣歌  
入都市當面洗人血常言荆軻愚每笑豫讓拙事已不  
受謝門前車馬絕自謂取功名焉能由筆舌

巫山高

巫山高高凝烟十二碧簷寒插天危崑絕壁已飛動況  
復下壓萬丈之蒼淵波衝浪激作深井虎眼徹底時一  
旋長風瀕湧發灑瀕惡色怒勢因誰然我欲截中流虹  
梁莫得施螭蜃東西相遠望不到兩目欲斷心將穿回



看高唐廟下灑靈雨遣我歸意常翩翩

水仙操

嗟哉先生去何所兮杳不可尋捨我於此使形影之外  
兮唯莽蒼之山林仰圓嶠之巍巍兮俯大壑之沉沉長  
波瀕涌以蕩潏兮羣鳥翻翻而悲吟寂擾擾之煩慮兮  
納冥冥之至音先生將一我之正性兮何設意之此深  
我已窮神而造妙兮達真指於素琴先生盍還此兮度  
明明乎我心

大垂手

華堂合樂轉春晝鳳叫龍嘶畫鼉吼瓊猊壓地開組繡  
美人舞兮獻君壽紅婆娑兮翠蚺蟠雪翻花兮風入柳  
曳輕裾兮揚綵綬金鸞飛兮玉麟走入急破大垂手香  
檀札札江雨驟情凝力定方舉袖烟收霧斂曲徹後錦  
盈車兮珠滿斗

採蓮曲

綠纈襠紅繡裳衫盤蜂蝶裙鴛鴦雕瑰錯寶垂鬢長紫

冒翠蓋行新粧蹁躑曲堤下回塘畫橈送入波中央羅  
袖卷起金釧光搖輕撼脆敲短芒丹瓊紺玉低復昂霏  
裊薄粉撲嫩黃蠶腰蛛腹絲颺揚列坐綵舫求比方笑  
聲吃吃動明璫挨蒲拂蓼次岸旁風吹落霞供晚涼西  
城鷓鴣啼女牆歸來索酒酌滿觴吳屏蜀帳圍象床因  
卧不起燈燭張琉璃盎缶叢生香

對酒

朝廷皦如日區宇清若水殊方文教達微品德澤被伊

人復何幸遇此粟陸氏茫然太虛內蒸鬱盡和氣真風  
浹敦俗無所容一偽唯宜對罇酒酣飲樂無事人間此  
昭世得偶須自貴無為名所勞區區取愚謚

白頭吟

憶昔宴華堂金徽導幽意雖知取名賤越禮奉君子相  
期本同穴誰復恥犢鼻一見茂陵人烟霄與泥滓願言  
保新愛妾以甘自棄恩義薄所終多生於富貴

芳樹

庭前有芳樹穠陰滿軒碧莫惜更携酒醉此青春色朝  
來見鷓鴣飛鳴繞其側光景不可留徒遣君歎息

武溪深

嶠南之武溪其深不能測潭潭溜瘴癘水色重如墨昏  
然潦霧作上下毒氣塞仰視高飛鷲跼跼墮兩翼交州  
惡女子制馭費銜勒伊余繆兵寄得總浪汨沒常甘馬  
革死持此期報國卧念少游言從之何可得

走馬引

羣蹄蹈空山半夜若風雨平明即其地已復天上去惟  
予迫大義盍免以名捕蝓蝸入寒殼此豈謂安處脫身  
入浩渺固有神物護禮謂不戴天天知天亦許

起夜來

曉牕明綠紗蜀錦壓春卧橫腮虎魄冷驚起新夢破玲  
瓏轉條脫縹緲梳矮墮高軸響銀床時誤君車過

長安道

長安道隋唐宮殿生秋草若使皆知嗣業難爭得行人

望中老

王昭君

四首

不惜將黃金爭頭買顏色  
妾貌自可恃誰能苦勞力

其二

絕艷生殊域芳年入內庭  
誰知金屋寵只是信丹青

其三

幾歲後宮塵今朝絕國春  
君王重恩信不欲遣他人

其四

極目胡沙滿傷心漢月圓一生埋沒恨長入四條絃

吳趨曲

萬頃平湖水晴光射早霞紅裙鬪畫楫相結採荷花

又

岸上相將疊鼓催青翰齊上碧波開鵝鵲鷗鴉不驚起  
慣見蘭橈日日來

又

蕩漾水中舟徘徊岸邊馬相看兩不語密意待誰寫



劉生

歷古推任俠彼劉生者何提挾擊朱亥引劍刺荆軻飲  
肆扶頭出歌樓掉臂過無人繼義勇關隴氣消磨

紫騮馬

翩翩紫騮馬爛爛黃金鞍流水四蹄急飛星雙目寒擁  
頭青玉鉞蔽臆綵絲鞶誰取交州鼓摸將骨去看

驄馬

鬚鬣擁如雲西人號乞銀更逢桓御史特地起精神

丹淵集卷二

欽定四庫全書薈要卷一萬四千七百九十一

集部

丹淵集卷三

宋 文同 撰

詩五十七首

貴侯行

將軍功勲滿旂常昨日賜對開明光腰懸橐駝紫金鈕  
爵號進拜諸侯王戟衣翩翩弄春影大第高門臨萬井  
但願囊書絕邊警常官中都奉朝請

朱櫻歌

金衣珍禽弄深樾  
禁籞朱櫻斑若纈  
上辛離宮促薦新  
藤籃寶籠貂璫發  
凝霞作丸珠尚軟  
油露成津蜜初割  
君王日午坐猗蘭  
翡翠一盤紅鞵鞞

拾羽曲

新羅研紅裙襍齊綵縷  
刺衫花倒提新晴暖日麗  
烟草金獸齧鎖藏春閨  
朱橋逼江曉沙白錦帶交  
風大堤窄蘭洲遺翎得  
淺碧歸來驚飛上嬌額

沙堤行

金吾馳騎東復西督兵萬指平沙堤傳言築路拜新相  
恐與九衢同一泥夜來上在蓬萊宿手寫姓名符夢卜  
連詔黃門下北扉趣草贊辭登力牧平明劔珮羅東閣  
大字滿行書德業謁者長言告紫宸感召一庭和氣合  
上心喜曰予良弼未謝急宣令直筆羣吏迎歸政事堂  
指顧之間歌畫一午漏初移催入馬寶帶盤腰印垂勝  
歸來冠蓋爛盈門異口同音賀太平

五原行

雲蕭蕭草搖搖風吹黃沙昏沉寥胡兒滿窟臥寒日卓  
旗繫馬人一足夜來烽火連篝火起銀鵲呼兵捷如鬼齊  
集弓刀上隴行犬噪狐嗥繞空壘羌人鈔暴為常事見  
敵不爭收若雨自高聲勢叙邊功歲歲年年皆一同將  
軍玩寇五原上朝廷不知但推賞

讀漢武紀

嗟哉漢武有天下甘心神仙希羽化五十餘丈起樓觀

萬八千里走車駕安期羨門竟何在五利文成終死詐  
若非留意尚文學嬴政且賢非爾亞

題東嵒隱者壁

青峰叢叢擁危壑綠樹團團扶曲閣幽人睡起漱寒泉  
坐看一林山雨落岩前火氣雜芝朮澗下苔痕亂猿鶴  
自憐塵土滿衣衫欲解從君今尚莫

東山亭

朝陽之峰乃天設曲嶺長嵒地盤結下臨絕澗走縈回

上聳巍亭飛巖嶸晚雲幾處水墨畫秋樹數番紅綠纈  
安能恰會此時閒靜與詩翁吟曉雪

水邊春半

芹牙差差蘭笋短石渠冰銷水色淺倡情冶思不可奈  
好鳥間闌花婉婉鮮衫翠裾者誰氏行歌楊枝惜時晚  
臨流有客抱危膝苦調長謠問誰遣

採藥歸晚因宿野人山舍

東岩陰深崖巘古夾澗垂泉結鵝乳我來採藥晚忘歸



試宿荆扉問鷄黍春風滿林燈火冷一夜不眠山月苦  
平明携策下青蒼松葉紛紛洒新雨

後溪晚步

陰陰芳樹暗回堤路入蒙龍轉野溪澤雉應媒高復下  
林鷗引子歇還啼青蒲宛宛全淹水紫笋斑斑半出泥  
倚杖風前感時節亂烟斜日一蟬嘶

山中新晴

山中新晴曉烟暖散帶頽冠漱岩畔海鹽未去猿鶴喜

柴桑初歸松菊亂林間餘雨時一滴嶺上飛雲忽雙斷  
安能舉手恣扶搖欲共高鴻拂霄漢

鹽亭縣永樂山叩雲亭

長江合高峰爽氣左右繞中流望絕巘萬丈見木杪孤  
亭揭其上隱隱一拳小李君令茲邑邀我升縹緲是時  
天宇淨晴色洗霜曉萬象滿四隅轉盼皆可了神清壓  
塵坌志適喜猿鳥人生貴軒豁世務苦紛擾茲焉獲登  
覽浩思欲飛矯今謂亭我為勝絕此應少願子立佳號

光輝飾松蔦因名之叩雲大字榜霞表

杜逸人歸龍山

上亭北望二百里顏巘墮壑圍龍山余嘗往來見之喜  
飲食夢寐皆孱顏恨無羽翼一飛到羨子長往不欲還  
安得擺手掉世故相與傲兀於其間

曉入東谷

振纓効王官釋耒去鄉縣十年始還此景物覺盡變東  
谷素所愛乍到若創見烟雲引晨策數里入葱蒨明霞

照溪口花草露初泣長松盤高岡竦竦擢秀幹垂陰雜  
羣木上欲接霄漢柔蘿互鈎鎖攬地走荒蔓修篁揭其  
間萬个挺若箭登臨愴舊歷眺聽悅新翫讀書破茅廬  
徑約已漂斷唯餘舍南水尚吐石竇濺潺潺落危壑滾  
滾引飛練臨流濯塵襟照影寔覩面功名竟何所旅跡  
轉孤賤引手謝猿鶴深慙爾驚怨

東谷沿小澗樹木叢蔚中有圓潭愛之久坐書  
所見

野水瀉古穴石岸盤回淵飛塵不可入竹樹圍清漣靜  
往得勝玩深居逃俗緣寒光照煩襟景寂心自圓枯篁  
蹲碧禽垂頸窺沉鮮對之不敢動相望兩俱禪

東谷茅齋

野徑轉深密靜無車馬痕松花金粉墮苔菜翠茸翻蟲  
鳥春音雜烟雲晚色昏俗塵何處入長是掩谿門

夏樹

夏樹始繁密條縷方且柔左右覆吾廬合如張碧油新

蟬噪晴午餘響藏深幽軒窓轉炎日清影為我留蚊蚋  
亦取庇闌若春雨稠拂揮不停手咀嚼胡爾讎何當薰  
風來一與掃蕩收吾將就高蔭濯足臨寒流

田舍

園林曉氣清籬巷夕陽明石竇聞寒碓烟坡見晚耕豚  
蹄供禱賽龜殼問陰晴欲識豐年樂一村雞犬聲

高槐

高槐夾前除合蔭卷若洞交柯載宿雨壓地翠色重青

蟲暖自挂黃鳥晴輒哢枕簟傲炎風為君高興動

春閨

枕帶縈春思窓紗漏曉光  
蠅蛸傷遠別鷓鴣感流芳  
粧匣蒸殘粉薰爐試舊香  
洞房燈燭外只有夢悠揚

採桑

谿橋接桑畦鉤籠曉羣過  
今朝去何早向晚蠶恐餓家  
家五十日誰敢一日墮  
未言給私用且以應官課

青城山丈人觀

羣峰垂碧光下擁岷仙家神皇被金巾坐領五帝衛威  
靈攝真境俗語不敢譁精心叩殊庭俯首仰紫華願言  
鳳羅盟畢世驅塵邪循奉藥珠戒期之飛太霞

上清宮

瓊臺橫紫霄上有縹緲居雲霞抱窓戶日月循庭除飛  
羽下金輦隱芝吟玉書俯首視人間人間臭如帑

張少愚書院

澗水侵斷橋車馬不得通飛嵐積庭礎秋蘚垂紫茸窓



紙爛溪雨簾衣折林風主人殊未歸使我烟景空

誓鬼碑

正一受天籙腰垂神虎章羣魔獄幽隱秘篆刻青蒼故  
事駭前志餘威驚大荒誰能識奧訣禹步學魁罡

天師粟

天師携此種至自上饒遠當時十七樹高幹倚孤巘蒼  
蓬蒺藜大紫殼檳榔軟蜀部名果中推之為上選

孫知微畫

太古奇偉士精思獨於畫馳心入茫昧萬物赴揮灑當時一名重顧陸非爾亞卓哉青城筆妙絕冠天下寥寥九天仗一一若神寫吾恐千載後是終無繼者

早晴至報恩山寺

山石巉巖磴道微拂松穿竹露沾衣烟開遠水雙鷗落日照高林一雉飛大麥未收治圃晚小蠶猶臥斫桑稀暮烟已合牛羊下信馬林間步月歸

揚山人歸綿竹

一別江梅十度花相逢重為講胡麻火鈴未降真君宅  
金鈕曾盟太帝家道氣滿簪凝綠髮神光飛鼎護黃芽  
青驪不肯留歸馭又入無為嚙曉霞

閒遣

庭竹擁高叢移床就好風掩門休務外隱几坐忘中世  
事元何物人心了即空客來休借問此意浩無窮

睡起

寥寥公館靜門掩似山家竹簟屢移枕石盤頻浸花閒

多新得策事少早休衙一覺高春睡誰來伴試茶

梅

寒梅引舊枝映竹復臨池朶露深開處香聞瞥過時凌  
兢侵臘雪散漫入春詩贈我歲寒色憐君冰玉姿

永泰劉令清曦亭

木杪照初日捲簾知曉晴軒窓無限思圖史有餘清露  
下濛花重風來泛竹輕何須嫌五斗持此謝淵明

貧居

繩牀擁敝裯初起髮未櫛南窓展書卷就暖讀寒日門  
前絕車馬薄暮垂片席短牆挂纖蔓幽鳥啄紅實羣蝸  
惡積雨繚繞篆空壁男兒處貧賤舉首宇宙窄翩翩槍  
榆鳩宛轉匿絮蟲妻孥競相咲憔悴守文筆

### 惜花

胡蜂採花花氣薄黃鳥啄花花葉落林風吹花花片亂  
池水浸花花色惡少年惜花會花意晴張青幃雨油幕  
勸君直須為花飲明日春歸空晚萼

正女吟

身外無一簪何以供鉛華飾行不飾容濁水白藕花藕  
心亂如絲妾心圓如珠絲亂端緒多珠圓瑕類無焉得  
偶君子奉之此高節所生雖至親此意安可說

莫折花

莫折花花好亦自喜勿謂花無言請以君心酌花意君  
容待花轉豐艷花枝因君愈憔悴莫折花任花飛地但  
對春風倚芳樹長遣香英伴君醉

織婦怨

擲梭兩手倦踏繭雙足趺三日不住織一疋纔可剪織  
處畏風日剪時謹刀尺皆言邊幅好自愛經緯密昨朝  
持入庫何事監官怒大字雕印文濃和油墨汚父母抱  
歸舍拋向中門下相看各無語淚迸若傾瀉質錢解衣  
服買絲添上軸不敢輒下機連宵停火燭當須了租賦  
豈暇恤襦袴前知寒切骨甘心肩胛露里胥踞門限叫  
罵嗔納晚安得織婦心變作監官眼

野花歎

昨者百草抽新芽今者百草開新花  
岩隈水側自成列紅醜紫賤何交加  
東皇施恩豈不溥隨所付受無少差  
爾之瑣細亦蒙被盡使奮發爭春華  
纖叢密蔓不可數競起塗抹如矜誇  
妖鶯冶蝶不爾顧去爾自欲尋名葩  
爾知有艷貴爾否歌管匝樹侯王家  
爾徒此地弄顏色只自狼籍隨泥沙  
何當照水自窺覽枝赧葉懼相藏遮  
晚村無限曬殘日索酒為爾成吁嗟



均逸亭 曾州三亭

亭宇跨城端新苔磴道盤風光晴水石烟景暮林巒簿  
領仍多暇賓從每盡歡何由掉塵鞅聊問借闌干

東溪亭

短舸逶迤渡高欄天矯沉波光環堵淨日色綠梁深萍  
荇翻金鯽蘭苕超翠禽主人公事簡時此照清襟

碧崖亭

斷巘淥溪邊危亭翠壁前軒窓誰是客詩酒自稱仙遠

壑春藏雨長波晝起烟吏人休報事高興正陶然

送郭經知縣

促促送歸客短亭垂柳風離樽掩殘日去騎若輕蓬百  
里謳歌內三年畏謹中鄉人問蜀物笑指一囊空

過祿氏山齋

過水得憑檻滿川皆夕陽江山逢勝絕手筆恨荒唐城  
郭蒙籠近汀洲杳靄長明朝又東去塵土入衣裳

題李處士月軒

圓蟾噴金波萬里灑清滴幽軒得虛敞皓彩溢素壁繩  
牀有高隱苦調起岑寂盈襟納孤光靜與爽氣敵

余過興州太守晁侯延之於東池晴碧亭且道  
其所以為此池亭之意使余賦詩

鄭谷題詩處荒涼不復知使君來問日景物欲歸時崖  
巘供清溜亭臺繞翠漪主人憐過客借與傲炎曦

蒲氏別墅十詠

風交蒲葦亂烟斷鳬鷺飛日暮一笛起扁舟垂釣歸

金  
卷三  
右方湖

軒窗曉吹清枕簟晴光冷亭上逍遙人滿身搖水影

右涵碧亭

逼簾呈素艷入座薦清香何以陪暑飲對之飛玉觴

右白蓮堂

曉靄滋花色晴輝發水光何人露新纈不管著秋霜

右芙蓉溪

積水自淵淵來源常汨汨岸上翠衣禽對人時一沒

右魚池

紫蓋嫩貼水玉梢長刺沙避風紅出沒驚雨綠交加

右蓮池

溪光搖玉壁雲影漏金盤誰此伴高興盡橋憑曲欄

右清蟾橋

決水轉橫渠交塍畫方罫秋風報秋熟滿頃吹罷亞

右稻畦

高臺按虛境飛駕羅太空小兆佩神虎每來清夜中

右朝真堂

深深鄭真谷小小焦光廬  
借問貯何物滿牀皆隱書

右草庵

丹淵集卷三

欽定四庫全書薈要卷一萬四千七百九十二

集部

丹淵集卷四

宋 文同 撰

詩五十一首

蒼溪山寺

正午風色高遂泊蒼溪縣層崖抱林木有寺藏葱蒨出  
舡步危磴蔭密頗縈轉上到金僊家緣空列臺殿修篁  
掛懸溜坐覺炎暑變老僧曉經論言語何貫穿引我上

高閣闌干俯江面寥寥百里內山水盡奇觀誰謂羈旅  
中所見皆所願汀洲白鳥聚井邑青烟散樂此暮忘歸  
踈鐘起岩畔徙倚下松門尚怪舟人喚

五里三灘

羣石壅水成哀湍五里之地凡三灘舡如走丸勢不住  
力敵萬弩雲濤盤門窓掩塞怕飛浪已倒牀座翻盃槃  
長年三老色自落捩眼不敢窺波瀾捎渦撇漩出九死  
衆命幸免魚鼈食須臾出纜繫高岸競以好語相慰安



是時左右有觀者應亦為我心曾寒

答公漑

晚泊答公漑船頭餘落暉携家上岸行愛此風滿衣村  
巷何蕭條四顧烟火稀問之曰去歲此地遭凶饑斯民  
半逃亡在者生計微請看林木下墻屋皆空園好田無  
人耕惟有荆棘肥至今深夜中鬼火流清輝衆稚聞此  
語競走來相依錯莫驚且哭牽挽求速歸

王會之秀才山亭

盤盤翠城山君在城中住溪流第縈轉岡勢復回互蒼  
林無春冬啼鳥常旦暮漠漠嶺頭雲霏霏岩底霧中間  
列亭榭佳景實天付物象皆自然人巧誰能寓浮生欲  
何事有此即樂處况君弟兄賢信道各已固詩書誨兒  
姪觴豆燕逢遇敢問彼簪裾何如此巾屨

謝友人寄畫

客從長安來厚紙封小軸題云此奇畫寄贈公可蓄開  
之掛高壁爛絹止一幅中有兩駱駝氣韻頗不俗大駝

載半髀正面頸愈曲小馳方就乳蹲身脚微跼一馬立  
其後才露頭與足三犬乃子母共臥啗鬻肉老羗抱朱  
旗狀貌何狠愎端然立高岸勢若不可觸定是西酋長  
華旗蓋鮮服不知何所來隨從無一僕初誰作此畫精  
妙亦可錄應餘右方在次第不止獨更願君訪求我肯  
萬錢贖

夏日閑書墨君堂壁二首

先人有敝廬涪水之東邊我罷漢中守歸此聊息焉是

時五六月赤日烘遙天山川盡慘燥草木皆焦燃塵襟  
既暫解勝境乃獨專高林抱深麓清蔭密石綿層岩敞  
戶外淺瀨流窓前邀客上素琴留僧酌寒泉竹簟白石  
枕穩處只屢遷忽時乘高風遠望立雲烟野興極浩蕩  
俗慮無一緣氣爽神自樂世故便可捐却憶為吏時荷  
重常滿肩几案堆簿書區處忘食眠冠帶坐大暑顙汗  
常涓涓每懼落深責取適敢自便安閒獲在茲恍若夢  
游僊行將佩守符復爾趨洋川山中豈不戀事有勢外

牽尚子願未畢安能賦歸田

其二

歸來山中住便作山中人冠帶亦自閒累月不着身散  
髮層岩阿濯足清澗濱石蘚黏簡冊松風墮衣巾鄉里  
多舊游不厭過從頻山肴與野釀待我如佳賓有召即  
走赴愛其愛我真常恐禮數乖取問吾交親正此一夏  
樂忽茲邁蕭辰還愧擁千騎又走西道塵

送馮允南倅梓

去年父老送督郵衣上淚痕猶未變今年吏民迎別乘  
馬前懽聲挽不斷梓州城中十萬家家盡喜見君面  
以君鄉里最相近物態人情素諳練況復才力强且明  
中理之的無漫箭從來府政號少事今更得君愈清簡  
太守李公詞掖老淘汰心源無滓澱時携賓從訪山寺  
惟以高譚侑清宴蒼崖素壁多自書是處新詩題欲遍  
君今到彼亦爾為異日唱酬知幾卷

宿東山村舍

是秋粟為白蟲所食  
蟲復為羣鵝所食

八十雪眉翁燈前屢歔問之爾何者不語惟拭淚良  
久云老矣未始逢此事種粟滿川原幸已皆茂遂喜聞  
欲登熟近復失所冀有蟲大如蠶日夜嚙其穗羣鷄利  
蟲食剪摘俱在地驅呵力難及十止餘三四供家固未  
足王稅何由備墾土耕至骨所得幾何利又今遭此禍  
不曉上天意在世幸許年必以饑饉死聞之不敢詰但  
愧有祿位移燈面空壁到曉曾不寐

季夏己亥大雨

金方口力  
卷四  
黑雲推空天地昏風勢猛惡山岳掀怪電燒熱噴霆喧  
鯨海起立星漢翻玉竿銀索傾鉗盆豪威怒力凌乾坤  
川陸浩渺同一源泛濫直欲浮高原澗谷洶湧龍蛇奔  
溝渠溪壑相吐吞土肉刮盡惟骨存漂蕩秋稼無一根  
天生烝民主仁恩覆露養育生理蕃誰持害鑰開禍門絕  
滅黍豆災元元無路能去陳九閭此事是非安可論

謝任遵聖光祿惠詩

常念文選詩最愛顏光祿君今作此官詩亦顏之躅尋



常得君詩如隼饑見肉凡當憂憤際不可不取讀我自  
山南歸幽居值炎溽六月久不雨萬物蒸煮熟正在墨  
君堂流體汗可掬單絺與圓素豈鮮療煩毒聞君有詩  
至猛起捧大軸拆開得累紙半日了一幅使我困病除  
如藥清頭目把詩坐前軒憤惋幾欲哭君也實高才徑  
庭無骯曲六十尚為縣不自耻碌碌近聞移小麾所用  
愈局促安得長康莊走此老驥馭哲士甘藜藿鄙夫厭  
梁肉天理不可問長吁倚喬木

謝任瀘州師中寄荔支

有客來山中云附瀘南信開門得君書歡喜失鄙吝筠  
簌包荔子四角具封印童稚瞥聞之羣來立如陣競言  
此佳果生眼不識認相煎求拆觀顚顚紅且潤衆手攫  
之去爭奪遞相趁貪多乃為得廉耻曾不問喧鬧俄頃  
聞咀嚼一時盡空餘皮與核狼籍入煨燼

霹靂

六月四日有  
父子被震者

君不見前時忽疑天地坼萬里一聲晴霹靂彼某氏者

爾何人敢自欺誣被誅磔子爛華容神火燎父碎梓潼  
靈磯劈惟震與曜今曉然誰對君親肆姦逆

後溪

新晴揉藍染溪色我愛常來坐溪側一林奇石宛如畫  
兩岸野花殊不識蟬鳴盡日競何事鷺下多時猶未食  
細觀物理須靜中歸去無辭更昏黑

黃功垂秘書嵐城閣

羣峰繞高軒四望如城密晴嵐逼窓戶淨若新洗熨香

香其中人衣襟照寒碧臨風設橫几蕭灑坐終日門前  
車馬道擾擾亂如蟲轉眼不復觀長歌傲簪紱

鳳山古祠

林木摧折堂廡傾其中瘞像猶縱橫狂巫騰踏野老拜  
瘦雞薄酒邀神明形容詭怪蛇虺亂聲音醜惡鴟梟鳴  
災牛禍犬亦可作世有此事何由平

靜中吟

客去復掩戶高松下清陰微風動其間對語雙珍禽幽

人獨凭几聽此古意深起來南窓下被以朱絃琴彈之  
代佳話俚耳誰知音

送黃庶先岷州赴舉

朝廷取士及洮西君今去就岷州薦男兒致身自有地  
六月萬里君莫憚君也經術三十年此發必中后羿箭  
聲名大抵重文章慎莫便從班定遠

大熱見田中病牛

隴上病牛良可悲皮毛枯槁頭角垂兩鼻谿訝只自喘

四蹄劣爰曾不皮牧童默坐罷牽挽耕叟拱立徒嗟咨  
朝驅暮使氣力盡爾死主人安得知

呈里中諸友

君莫怪我不讀書君莫笑我不飲酒更精文史豈足用  
漸老懽娛復何有負郭安得二百畝舉家已聚三十口  
且來伴我數月閑未幾區區又西走

寄彰明任光祿遵聖

軒軒任公子本是釣鼇人手把虹蜺竿一舉百萬鈞得

鼇謂無用坐卷千丈綸却自絳蚯蚓淺瀨收纖鱗悠悠  
世上兒不識此有神但將俗士眼下視窮水濱

庶先北谷

路自西溪入園當北谷開月亭詩作客雨館睡為媒摘  
果衣霑露尋泉屐漬苔閒居正無事莫問我頻來

謝王庶軻秀才見贈諸篇

覽君山中詩多有贈我篇感此意愛厚使我將潛然世  
態日衰薄交道君獨全豈若賤丈夫心醜貌甚妍我已

嬰組綬君方傲林泉出處雖有殊所樂同一天

前溪獨遊

溪水碧溶溶紆餘短約通小灘晴靄外獨鶴夕陽中倚  
杖對清瀨披襟當好風幾時歸住此長下釣魚筒

書綠帷亭壁

喬木繞舍如綠帷羣山四面寒參差春禽入秋啼自別  
早雲到暮歸常遲庭前好菊勸飲酒案上佳紙邀吟詩  
閑居數月興便野渾忘簿書相聒時



青山道

冥冥青山道叢木含古烟遠客事行役未晚不敢前乳  
虎正養子采食大路邊但顧已所急其誰辨愚賢

野老

野老扶白頭耕墾事田隴豈無兒與孫凍餒實我恐地  
產止數出財用知幾種食肉與衣帛賢者何言冗

誰氏子

縹緲誰氏子學道要昇仙人世豈不樂何苦求上天反

首顧我語子豈得謂賢智如撲燈蛾甘就膏火煎

秋興

晨風吹茂林夕露下芳畹秋容變憔悴復此白日短蕭  
蕭歲華暮冉冉節物換浩歎倚前楹使我心曲亂

其二

百蟲感秋陰入夜聲更切問爾苦何事到曉嘯不歇盈  
庭不可止翦藏藏萬穴會是天使然相將送凋節

書平泉草木記後二首

衛公當國日力與天地均平泉植草木取盡四方春海  
嶽欲必得亦能役鬼神可笑身未冷已聞屬他人

其二

公豈不聰明嗜好乃如此若非以私餌是物安至止彼  
致者何人定非端潔士草木固為塵醜名終未已

重過舊學山寺

當年讀書處古寺擁羣峰不改歲寒色可憐門外松有  
僧皆老大待客轉從容又下白雲去樓頭敲暮鐘

書隱者壁

枳棘分三徑猿猱結四隣茂林修竹地枕石漱流人  
看雨撐藤杖迎風卸葛巾我來懷愧甚衣上有紅塵

訪古寺老僧不遇書壁

寂寂復寂寂門前苔蘚積巾鉢定何之禪房封屈膝  
蛛絲網窻戶蝸涎篆牆壁欲去重遲留空中望歸錫

村居

日影滿松窻雲開雨初止晴林梨棗熟曉巷兒童喜  
牛

羊深澗下鳬鴈寒塘裏田父酒新成  
餅罌饋隣里

宿田家

日落雲四起牛羊下高原今夜宿何處  
孤烟生遠村寥寥岩狖響擾擾林鷗喧  
危坐欲終夕此意將誰論

太熱

大熱早復暮幽居如火圍更無風稍快  
只有汗頻揮袒露憂生客沾濡怕熟衣  
何當生兩翼直近廣寒飛

閒樂

晝睡忽過午好風吹竹牀溪雲生薄暮山雨送微涼粉  
袞衣裳潤蘭薰簟席香歸來閒且樂多謝墨君堂

寄楊歸一

出處久異矣居常勞所思烟霄惟子未鬢髮已翁為世  
故豈須問人生當自知林泉聞幸好足可樂明時

行李載書成詠

於世已無用何苦愛讀書自笑身許大所處如蟬魚編  
簡補斷爛卷軸收殘餘又鎖十餘篋作數隨行書

還友人詩卷

作詩所患格不高君今已得詩中格吾鄉風物最清麗  
君向其間作詩客定餘絕景在幽深更欲煩君用刀尺  
上亭北軒對月吹笛得才元舍人昭華引醉霜  
月草堂吟皆詩譜也

三首

潏潏金波瀉碧空隔霜寒影下征鴻夜深一笛昭華引  
吹滿千岩萬壑中

其二

羣山暝色烟開後  
遠水寒光雨過時  
今夜何人醉霜月  
臥聽緱嶺玉參差

其三

涪江東岸有雲林  
巖嶺縈回澗谷深  
何事遲留未歸去  
強顏猶唱草堂吟

苗子居運判歸宿州  
同赴武康西縣道中奉寄  
二首

霜風舞征袂  
有客去苻離  
斜谷雪晴後  
曲灘水滿時  
亂



山誰對酒孤驛獨吟詩不得陪清絕悵然空所思

其二

漢中為會失兼程雨雪曾無一日晴  
扞項橋頭聊立馬使車應已過褒城

孫懷悅紙本亂石

老孫抱竒筆臨紙恣揮灑從頭掃亂石  
硃墨隨墨下焦頑與圓潤無一不精者  
誰信萬鈞重卷之不盈把

熙寧辛亥歲春予自京師赴陵州因過家省墳

墓是時見所居東西長衢比戶競取榆栽列植  
於官道左右者後移興元滿替復歸待洋州闕  
始四年爾而榆已高大繁茂深密可愛予正得  
此過一夏旦夕與諸親友優游於其間蒙庇厚  
矣閒因作詩示諸君

昔我去守陵陽日門前夾道初種榆今年我自山南歸  
向椽大者皆柱麓兩邊合陰若深洞滿地清影繁如鋪  
是時暑氣正炎酷無處容此煩病軀晝搖清風夜篩月

日日不可離羣株閒邀親友坐其下左右間設琴與壺  
人生適意乃為樂此樂已恐他更無霜飈未起枝葉在  
且與諸君同此娛

旱雷

夏旱亦已久衆懼非常災茫茫大田中赤風起炎埃密  
雲徒滿空甘澤竟不來但聞南山下日日喧怒雷

久不雨喜見晚雲

晚雲萬丈如銀山日光返射紅孱顏莫誇突兀在天上

且放靄靄來人間雷公施力已憤怒風伯壞事休庸頑  
我將待之至夜半慎勿更似前時慳

丹淵集卷四

謹案卷一第三頁後五行內冰筋與玉骨兮刊本

內訛向今改

第四頁前五行葉獬豸而若窳刊本獬豸訛獬豸

據洞簫賦改

第八頁前六行蟠桃春兮白榆秋刊本秋訛林今

改

第十頁前七行後余出守於陵陽刊本後訛復今

改


卷二第八頁後五行鵲鵲鵲不知起刊本鵲訛  
屬據玉篇改

卷三第五頁後三行讀書破茅廬刊本廬訛蘆今

改

第七頁後四行上清宮刊本清訛青今改





總校官庶吉士臣侍朝

校對官編修臣閔惇大

膳錄監生臣楊星

膳錄監生臣沈啓晉